

*Tico Croes ta reacciona ariba desenlace
caso tubería di WEB*

CALUMNIA Y MENTIRA DI GOBIERNO A KEDA PROBA

Nelson Oduber no ta digno di ta Promer Ministro

ORANJESTAD (AAN): Dialuna AVP a ricibi informacion di Polis cu a logra detene algun persona cu supuestamente lo ta envolvi den e cortamento di e tubería di WEB cu ta bay pa Coastal.

E Miembro di Parlamento pa AVP Tico Croes a base di esaki a mostra cu ainda ta fresco den memoria cu e dia cu a instala Gobernador nobo den Parlamento AVP a worde informa cu Promer Ministro Nel Oduber a bay medionan di comunicacion v a acusa AVP di lo a

comete sabotahe cu tubería di WEB cu ta bay Coastal. E mes anochi na Tele Noticias tambe por a mira henter Gobierno para na e tubería di WEB hunto cu cierto miembran di coalicion den Parlamento. Tabata musta cu camara con e tubería a worde corta y aki tambe a haci insinuacionnan na direccion di AVP.

E mesun dia e partido di gobernacion MEP a yama un reunion di lidernan di barío di e partido MEP pa papia encunto e supuesto sabotahe



y acto di terrorismo. Por corda tambe con den propaganda tabata tilda Partido di Pueblo Arubano AVP di tur sorto di sabotahe y terrorismo.

AVP a reacciona fuertemente ariba e insinuacion baho aki pasobra AVP no ta un partido cu ta haci tipo di cosnan baho asina. AVP a bay mas leo y a manda un carta mes ora pa Ministerio Publico pa pidi Ministerio Publico pa áctua rapidamente y persigui esnan cu ta calumnia AVP. A pidi pa persigui Ministro Presidente y Ministro Briezen y otronan.

Tico Croes a mostra cu awe AVP ta contento cu el a worde absolvi di cualquier pensamiento y sospecho di loke a socede den e caso di tubería di WEB. Esaki ta importante pa motibo cu den e mente di Pueblo mester keda cla cu no solamente Promer Ministro Nel Oduber y su partido a usa mentira como campaña pa yega na poder na 1989 pero cu awor nan kier a sigui cu e mes instrumento di calumnia y mentira. Pero awor aki como instrumento di gobernacion.

Tico Croes a mostra cu logicamente cu un persona cu funcion di Promer Ministro

cu ta usa mentira como un instrumento di gobernacion; no ta un persona digno pa goberna e Pueblo aki y mester saca su conclusion. Loke el a haci ta di tal magnitud cu e ta ocasiona division y rabia den comunidad. Un Promer Ministro tin e tarea di trece union y tranquilidad den Pueblo. E actual Promer Ministro Nel Oduber ta sembra lo contrario.

Ta pesey AVP lo bolbe acudi na Ministerio Publico awor cu a sali na cla cu tin personanan cu a worde deteni den e caso aki. AVP lo pidi Ministerio Publico pa awor cuminza mesora cu e persecucion di Promer Ministro y Ministro Briezen cu a lanta calumnia contra AVP.

Señor Tico Croes a expresa e speranza cu esaki lo ta un les cu no por usa mentira como instrumento di gobernacion pa keda na poder y keda dividi e Pueblo. E ta spera cu Promer Ministro Oduber siña e les cu su tarea ta pa trece unidad y tranquilidad.